

紀

憂

竊

書

附查勘禁煙日記

杞

憂

芻

書

附查勘禁煙日記



緒言

理論者事實之母也天下容有理論不見諸事實未有事實不根諸理論者是書如理財一篇曰公捐公費曰預算決算去毒一篇曰從官界人手教務一篇曰設外交儲材館種種概論無一不屬個人理想之談各當道雖蒙見納而亦未必誠實注意迨遷延至今日時勢與事實愈演而愈合前此不料有是事實其曲折奔赴不覺竟有是事實倫所謂理論爲事實之母者非耶頃間交卸康平篆務旅次檢拾行篋偶得此三紙芻議益以康平任內條擬治東八策計共四篇文筆雖淺陋而即因見果甚願天下造時勢者多創正當之理論以吸收將來立憲正當之事實庶於全國社會裨益非淺爰付剞劂以供諸大志士一商榷焉時宣統三年荷月皖青陳嘉言嘯清甫自識

573.07
378.5

杞憂芻言目錄

上清戶部尙書趙理財書 光緒三十年秋

上清兩江制軍周去毒書 光緒三十一年冬

上清外務部教案善後書 光緒三十二年春

上清都察院代奏治東八策書 宣統二年冬

杞憂芻言 目錄



傳20572

上戶部趙尙書書

光緒三十年秋在本籍辦理蓉城小學堂時呈

竊居恒研究四子六經攷求治法凡帝王之經世聖賢之垂訓千條萬緒不外教養兩端然權此兩端輕重必使之措置裕如者又莫先於富之一說獨是處今日而言富國僅狃目前之聞見無當也徒拘成例之沿習無濟也必調查二萬萬方里行省之出納四萬萬人民思想之嚮背暨各商埠進出口貨之消長然後因革損益分門列表定公捐公費之章別預算決算之類扼其體要酌其輕重定其實罰昭其信守庶朝廷不涉叢脞之虞而全國坐享利源之富也已

何謂因上下相安公益所在其因之宜然因則因矣而因之中又有益之之道如大部所掌田賦鹽政關稅皆我朝列祖列宗規畫精詳載列大清會典自昔迄今臣民恪守無異無異者即公益之所在也若近年議變法者謂計田加賦就場徵稅裁釐加稅諸條奏其用心不爲不苦然成法已久人情所安驟欲變更難保無失業騷動之現象無已就田賦論只有通飭各行省查荒招墾或勸各地方紳董遵照商部集股公司辦理墾荒一法就鹽政論曾文正公立法已盡善矣本無庸議今爲理財起見鹽政又係大宗入款乃可於

灶課商課鹽釐三項通飭各該管官持平酌核增加次第按抽俾免同時鼓噪庶乎近焉就關稅論裁加一節原係各國囑允賠款起見果直百抽十五之稅加矣而中國各處釐局能否即行裁撤屬在商民疑信未決倘能加而不能裁非惟於商務有窒碍而各國交涉又恐添一番枝節矣大凡將然未然之事籌畫於先必熟審於後與其後疏於先不如先謹於後兩利相形必權其重兩害相擾必去其大今日而言關稅商民已不勝其煩擾即釐能裁矣而掣驗局在所必設臆局委者又安必不層層剔駁節留難乎如謂任其剔駁留難則朝廷徒擁裁併之名而商民仍受滋擾之累是何如先定某處釐金局裁撤某處掣驗局尙留明示某局准用司員若干名酌核訂驗簡要章程通飭榜貼通衢暨各局所俾商民一目瞭然心無疑義庶上以便商施之而民即實惠沾之其稅務或佔優勝不然商民衝突將奈之何此因之中寓以益之道之大較也

何謂革道與時爲變通法積久而叢弊如大部所掌權量錢法雜征諸要務昔日行之利在民今日仿之利在官權量一項前經順天京兆奏請頒行割一之式以定統一之制洵屬法良意美今日久未見施行其中不無阻力擬再請設法堅行不惟於商務剔清弊竇

即國家於錢漕項下納銀納米之處大部預算表內亦可核定唯一之規否則此重彼輕此大彼小參差不一安得謂之公益安得謂之大同此權量之弊可革者一國家頒定錢法代有異名惟至今日爲尤甚銀有雜色不等平有足折不同洋元龍鷹等異價中國既稱統一銀洋兩位自應一律今美員精琦君來喇圖法條議顯之爲中國理財籌畫隱之爲各國賠款措置稍一不慎墮其術中悔無及矣目今中國圖法現象不改革不整頓而虧損之因果將有江河日下之勢然竟改革整頓總以虛金實銀爲本位俾內政外交兩界無抑勒中飽之弊無喧賓奪主之憂是爲恰當制勝之應付此錢法可革者又其一至雜項內稅契一條如舊經奏定加稅章程每兩連原額核加共計六分六釐不准書吏苛索本寓體恤之意然值此餉需支絀之時即於稅契項下嚴杜中飽多取之亦不爲慮以稅契由買戶所出既稱買戶每兩即多出一二分未始不可茲經切實查訪據稱上所得僅有如許之數而各州縣及書吏所得仍浮於加倍有奇此中飽之弊可杜而稅契之價可增如謂一再遞加有碍國體或請明定稅契章程每兩應完正稅若干各州縣解費及書吏筆墨費若干通飭各行省遵照榜貼示知庶上實受其利益而下得破欺蒙矣此

稅契之弊可革者又其一

何謂公捐同光以來承平日久各行省身受朝廷厚恩如將軍督撫關道各大臣節令翰將名曰報効捐是也其辦法以居官年代之久暫定捐數之多寡其查有家賞鉅厚典當林立者仍請明定數目切實勸導鼓其見義勇爲之氣激其毀家紓難之忱子盡於父臣盡於君即行之三代帝王之世亦未爲過也及觀本年日本與俄國開戰國家設售價票其臣民報効逾於原額者何其踴躍若是極而至於囚犯每有日減飯賞一頓湊濟餉需其數雖微其報効之心較他人尤堪嘉尙況我中國臣民素明忠義食毛踐土具有天良焉有身受厚恩而不思本本水源以國家遇我之殊恩報稱國家艱危之際乎夫精衛尙有心填海愚公猶矢志移山苟千仞之衣能振自衆志之城可成人言中國今日情形譬上枯下困中飽之情形也平心論之此捐一行不惟民怨胥捐而他捐且易收其效果此公捐之宜開者一也再近今各省演戲打醮兩惡習均係例禁之條據中國現在情形貧病交深而各處舉行無益之會戲會醮較前仍年甚一年日甚一日其故何哉推其原因由禍福之說之中於人心深矣今者世變日亟擬以變亂二字易禍福二字悚動之俾知

禍福屬於未然變亂屬於將然並懇條議禁止章程通飭各行省示禁倘或不能驟禁即請續定提取公捐章程指按戲醮兩價值十抽二賓主各出一半由各地方官諭董辦理造具各鄉會戲醮底冊呈縣立案屆期由縣給示保護所提該縣戲醮之款即充該縣學堂經費化無益爲有益易無用爲有用與提充他省外郡歸書吏中飽者不同各省地方稍明禮義者想無不欣然樂從丕興學校且學校多得地方一分公款庫帑即少一分津貼互爲消長莫此爲宜餘可類仿此公捐者又其一

何謂公費朝廷設官制祿原有常經今值新政頒行在在需費如謂各府廳州縣遵奉近今上諭詳開各項出入不准私自隱藏務期和盤托出等因洵如是雖曰巧婦亦難爲無米之炊是何如除廉俸外另行釐定公費章程酌其上中下各缺指某缺辦公費若干以上中下爲增減先立預算表通飭各營撫行知然後再飭遵依各缺繕具清表詳注某項如何收納某項如何支出庶各府廳州縣心有方針不事欺隱而呈列之表或可核實計算如僅先飭呈報未經酌定公費其各官吏未必若是之公忠體國不涉誣妄也再此公費章程先由各地方官一律遵行以次推行各局所暨關卡庶無顧此失彼之慮此公費

之宜定者是也

以上皆因自然之利革潛滋之弊而約略陳之至於汰冗官併局所開鑛產各節在在係內治開源節流之政夫人皆知有自主之權而不患其不就緒乃有與內治相反對爲最大最急最危險如庚子以後大宗賠款吸我髓吮我血縛我手足剝我皮膚之強硬漏卮窮鄉僻壤愚夫愚婦未必盡知之也夫天下有形之耗易知無形之耗難知有限之耗知而易籌無限之耗知而難籌查光緒二十七年賠款共四萬五千萬兩以三十九年分期償清每年約攤一千八九百萬兩中國雖地大物博猶人之一身每日只有如許精液若時耗而刻削其命未必不斃欲救不斃節飲食慎起居外感宜防今爲中國計僅僅整頓內政而不慎重外交握定自強主義雖今日羅雀明日掘鼠等於剜肉補瘡其患終不見愈即如近月江西湖北山東四川等省各教案層見疊出將來交涉要求之處又不知作何結果究之出一次教案外洋佔多數強權中國吃多數虧損如謂各省教案歸各省承認其各省之財力又係誰家之財力也是皆地方有司不諳公法條約動輒偏袒有以致之耳地方有司不諳公法條約又係朝廷未與各國囑訂教案簡明專章宣示各行省通

飭各地方有司俾有遵循之故耳自今以後洋人接踵繼至日多一日擬請奏飭辦理教案定章俾中國民教相安各行其是實爲永造萬民無疆之福要而論之今日中國不抱重外交主義即百計搜求釐剔中飽佔多數之籌款而究恐不足當一教案之衝突潰決也已語云治病求其原救火去其薪茲陳理財之道始以整頓內政要以注意外交未嘗有當求原去薪之法否用敢謹獻芻蕘郵早鑒核不勝隕越惶恐之至

.....

柜
經
錄
書

上兩江周制府書 光緒三十一年冬寄江蘇徐州府郵呈

竊維富強之基礎首資吏治而吏治之整頓首要去毒查中國吏治近今時代其勇於自治屏除一切嗜好勤慎從公者固多而因循坐誤中毒鴉片難期振作者正復不少在昔閉關時代以同種之人辦同種之事稍不盡職或可寬恕今既門戶洞開華洋雜處交涉之案無地無之供職人員即殫精竭力俾夜作晝從事於法政之中尙慮不能普及安得候補員中容有此輩多數中毒鴉片者以承乏艱難鉅任而爲四民之傀儡也乎嘉言頻年披展各報見各省大吏參劾屬員連篇累牘動占多數或因性情疏懶或因貪鄙妄爲或因嗜好太深或因年力衰老而於鴉片一項要未明言即如近今留心時事條陳去毒者有謂各省宜官設戒烟會有謂各省宜仿日本在台灣歸官專售烟膏局其他若上海商務總會董曾觀察提倡振武宗社聯絡內地人民入社誓終身不吸鴉片種種設施其用心不爲不苦惜皆於普通社會策之且以上諸辦法尤係柔和之補救能收效於逐漸不能收效於一時今之時危迫亟矣去毒之法擬先從上等社會入手較易於普通夫上等社會如官場一界有關係全國政治之重大有轉移全國人民之位望事施於半功收

於倍有必然者況乎天下事懲之於求我利益之人易爲力勸之於我求人之利益難爲功平心論之凡事不可專制惟去鴉片之毒可行專制去鴉片毒於各界中人不可專制惟去鴉片毒於官場中人乃可行其專制何言之人而既入官場皆係求我利益之人決之東方則東流決之西方則西流一轉移間鮮有不唯命是聽者既唯命是聽矣各當道又何樂而不爲爲今之計立法固宜爲其易不宜爲其難宜務其約不宜務其博區區之心擬請大帥實力整頓明定官場吸食鴉片專章奏請通飭各省將軍督撫嗣後在省文武無論已補未補有差無差凡中鴉片毒者在任撤任在差撤差其未蒞任到差者一概停委各直省務宜遵照辦理如違罷職似此風聲所樹影響必普及於同僚不甯惟是即農工商界之中是毒者行將父詔子兄勉弟咸知此毒一染不惟貽人輕視且更無路觀光所謂一舉數得實行無弊者此也

乃議者謂此舉固爲當今切要之著恐當道者不能破除情面切實辦到日子言或然予將有進焉者譬人處一家之中見其伯叔兄弟有中是毒者銀錢之耗費精力之消亡陰陽之顛倒當無事時終日不出門戶此身常醉黑鄉無論矣即有特別事故內外交催而

今日推於明日寅時諉於酉時一誤再誤後患方殷爲子姪者雖欲隱忍不言安得而不言雖明知言之無益而爲保家起見與其不言而敗何如痛哭言之家長前倘或使之能去能保未始非造家之幸福也家既如此國亦類然知中毒之敗家即可知中毒之誤國國之與家其義一也是烏得而不言

議者又謂誠如上文所云明定官場吸食鴉片專章在任撤任在差撤差等辦法何其不代人設想而爲此嚴酷之章程也曰子不見盜賊之入人門戶耶執其子弟掠其家財焚其房屋而朝廷定例斬立決是何不寬大以縱之子又不聞一路哭何如一家哭之言之刺骨耶今官場吸食鴉片者雖不若此之甚而晏安鴉毒遇事不能與民直接是亦何異坐地分贓衣冠盜賊者之所爲語云兩害相形必權其重去一人以救萬人君子初不爲一人惜今去一人以救一縣長官又何樂而不爲也

議者又謂官場吸食鴉片者宜去而弗用明矣惟一旦罷黜之後其將聽其閒散乎抑別有所安置乎曰專章頒行各省城應設一官場斷烟局凡因撤差撤任以及中毒候補人員自應一體到局斷絕飯食自備其有年老不願者聽其回藉局內章程尤宜詳細酌訂

限期斷絕主斷絕一年後統由該管督撫面試觀其顏色辨其體質然後復密委委員察其所安會否斷清造冊具報再定委署予言去毒非惡其人而去也惡其烟毒而去也毒果已去前之有差者仍委差前之有缺者仍委缺概不照參撤例論該員又何憚而不去也

議者又謂安置之法得矣恐專章頒行官場中人犯此者保無有反對之弊乎曰子迂矣人既入官場心地光明人格尊重宜如何束身自愛激發天良以仰副朝廷孜孜求治力圖自強之盛心况王章具在各省吸烟之員未必盡居不肖即有少數不肖之員斷不至起蕭牆之禍再嘗據人言凡中此毒者往往自恨不能自脫今既薄示威懲以脫終身之累復又周旋考察以定擢用之階宜乎焚香祝之結草銘之以爲他界染是毒者勸反對胡爲者且中國人目光最近思想最小不斬近因不收遠果不撤本身之權利不獲將來之振拔此古今歷史上迭相徵驗者非一人私議也如謂大度包容待其自知悔悟則若輩掩飾愈工沾染愈甚貽害個人之利益事猶小貽誤國家之政治將奈何此嘉言數年前思想及此而不敢言今迫公益所在而又不得不言者也

抑嘉言 尤有請者居恒讀書見中庸篇載文武之道布在方策其人存則其政舉其人亡則其政息數語每恍然曰此殆即治法與治人相輔而行之確證也其曰人存非存其形骸也存其精神也其曰人亡非亡其形骸也亡其精神也今中國官場吸食鴉片者固明明其人存也何以政治上嘗占多數劣敗大則貽君父之憂小則貽外人之笑如近年鬧教罷市盜劫各案層見疊出其故何哉非盡民之不良也實由該管官徒存形骸而亡精神以致之耳既亡其精神朝廷即以此輩自外生成屏去弗用各大憲即以此輩偏於嗜好勒令休致未始非振興國勢力圖自強之要道也況今朝廷頒行新政在在需人尤在在需有精神之人若無精神斯無政績國家曷貴有此人地方曷貴有此人此人既爲士農工商代表之人格尤宜於省城仕學館或法政學堂規則內編入鴉片一條凡犯此者不准在館肄習俾各候補人員咸知戒懼爭自琢磨不然無論該員在館肄習何如即令學有進步而到辦事時思想所及精力不能貫注亦徒然耳此非好爲其難實迫於近今競爭世界新政發現之時不如是不能收治人之效不能占優勝之場今幸大帥控制兩江爲各省觀聽所係登高一呼衆響斯應有斷然者 嘉言 誼叨桑梓年未強仕嘗三復於

顧亭林氏所云保天下者匹夫與有責焉之義用是不揣冒昧謹陳管見竊瀆清聽所有擬請明定官場吸食鴉片專章是否有當伏乞採擇施行大局幸甚至能否專奏請旨通飭遵行之處出自鴻裁無任隕越待命之至

是書郵上後即蒙批交仕學館通行嚴禁官場吸食已於次年二月初七日上海時報

節錄矣 附識

上外務部書

光緒三十二年四月在京青陽會館郵呈

竊中國自開海禁以來上下臣民兢兢然日懼其有而不能必其消弭者教案是也外國在中國境內傳教之士競競焉日逐其欲而不慮其不得志者亦教案是也惟是教案之出在中國既不能必其消弭在外國又不慮其不得志然則其將任其波靡乎抑或有所補救乎凡屬食中國毛踐中國土者是不不得不以此絕大問題力事研究查外國在中國傳教載在約章遵行日久拒之既不能聽之又不可往事弗論矣即如本年二月二十九日江西南昌大教案一出稍有寸心肝者莫不爲之狂極以爲中國國權弱如此極若再不力求補救將來中國土地恐無有一片乾淨者嘉言平日披閱報章約章凡對於國際交涉政治交涉宗教交涉皆爲之三致意焉此次南昌宗教問題一出結果之善與不善朝廷自有權衡非外間所敢妄參擬議竊以爲此次大教案之開議無論優劣何如誠能於未結之先豫籌對付善後傳教專章由中國宣布各國駐京欽使從速提議頒行然後再與英法兩使臣開議南昌教案此策之上焉者否則與英法兩使臣開議南昌教案時須首先將對付善後專章宣布於此次南昌教案議結後即由中國訂期向各國使

臣開議各國應允一律提議共保治安載明此次南昌正約猶策之中焉者如再不然南昌教案日今曾否議結外間不得而知倘或已結似未便再行開議惟此間關係重大不得不慎審周詳預清治本如嘉言所擬後開各條不無可採擬請設法釐訂復與各使臣磋商妥議作爲此次附約亦策之下焉者要而論之中國此次開議果能於三策中得上焉者無論彼等異日要求何如我即降心相從而東隅之失桑榆之收普天人士當亦共諒苦衷而爲前途致賀即不然而得其中與下焉者雖不敢必民教永遠相安而有此約章則教案之逐漸消弭外交之易於措辦未始非廿世紀中佔一未雨綢繆之至計乃識者謂此次南昌教案議結之善惡即將來禍福之機係之稍一不慎大局危迫斯固然矣而嘉言日夜所皇皇然冀其結善果而不敢必者亦以中國之強權未甚發達耳查泰東西各國當強權未發達時凡與外國一切交涉勢必先謀優勝地步取法乎多數之上策明知本國之目的不能直達而中次以下之策即遇極野蠻之與國亦得允其一二以示友邦之好況乎號稱文明大國耶語云取法乎上僅得其中即此意也今嘉言目的所注此次教案能得持平辦結各認其非善矣即不幸而受不白之虧損忍禍一時造福來

日亦屬亡羊補牢之正辦未可作等閒觀也設如此次再聽要求不提善後之辦法則來軫方長後患無已大局何堪設想嘉言乃中國一分子也明知言之無關輕重且足增罪而爲公安起見緘默有所不忍謹擬善後辦法大綱四則敬爲我王爺中堂大人縷晰陳之

一劃清政教權限 查外國傳教既非一國又係通例何以宗教問題在外國則不受政治影響而一至中國宗教問題動與政治相牽涉此何以故徧覽約章其中原因不同大別有二一外國在外國傳教首先釐訂條約嚴定教士權限不得干預傳教地方公私事件有則由本國政府聲明該國領事官撤調二本國教民須束身能受該教十戒者方准入彼教籍凡屬無賴及因滋事或欲欺人希圖奉教者概不准收入教籍所以在他國教士教民未聞有中國若此衝突者始終皆以善善爲主義即遇有宗教問題而宗教自宗教政治自政治亦未見因宗教而要求割地開埠路礦種種特別利益之權中國則不然教士入內地傳教平民入教堂奉教一切作爲皆與他國成反比例此其因雖禍於道光間外交家不諳公法不識洋文卒被欺朦凌夷以迄今日然大錯已

鑄而銷化主義不可不趁此南昌教案問題首先提議以爲將來民教造一無量之幸福夫論銷化之義於往昔百無一二之成而論銷化義之於今茲庶有轉圜之機會何言之在昔教堂未林立教案未繁多即各國教士與各國國家咸有奮往直前之目的今不數年而教堂徧設矣而教案疊出矣中國雖受政治之損外國亦多性命之憂如謂懲辦愈嚴則教禍愈熾將來種種惡果斷非誅戮所能寢息是何如開誠布公將此棒喝之言與各國使臣商定宗教政治專章分別權限彼此共享治安之爲愈也此在今日不可緩者一也

一 標清各國界限 查中國近數年鬧教各案往往因此教不諧禍及彼教此最野蠻之舉動文明各國所不許今之南昌教案其最著也然平心論之小民暴動波及無辜罪不容赦而推其所以致此之由亦有不能盡責其非何以故蓋小民愚蠢無知者實占多數加之平日戶庭不出如簪簪一般凡所謂中國通商曰英曰美曰法曰俄曰德曰意曰比曰荷曰葡曰日本各等國既無區別之見聞復存畛域之私臆當無事時固各相安於本位及遇有教民恃符欺壓積忿難平浸假而謠言四起矣浸假而皂白不分

矣浸假而焚殺並舉矣究其種種原因一由教士之約束不嚴一由平民之知識有限今從二者之間思一治標之法無論何國教堂乞與各國使臣妥商由各該國通飭各教士凡屬教堂門首一律大書某國字樣以清界限而使平民了然於心倘遇事不測某教堂露起不過該教堂被其實禍而他以外之各教堂斷不至因類波及互相要求此雖無甚深意要亦省交涉之一法也再教堂門首既各大書某國字樣而各教士自有名譽密切之關係遇事必能顧全大局以重邦交而免殃及如其不然中國之民程度最低平日心目間只知有洋人而不知某國之洋人知有某國之洋人而不知某教堂係某國設立不惟平民然也即號稱士紳之輩亦有十之八九茫然者矣所以各省每起教案無論何等教堂動遭波累皆坐此弊是教堂標明國界在今日又不可緩者一也

一重申各國傳習各教諭單 查咸豐十一年法國送到總理衙門傳教諭單內載教士赴內地祇以傳教勸善爲務并無他意亦絲毫不得干預地方公私事件倘該教士有干預地方公私事件者應照諭單駁回不准同治元年法國欽差大臣布送到總理衙

門照會內稱該教勸人道理無非尊崇君上謹守中國法度同治五年經總理衙門議准教士除教務外不得干預一切公私事件光緒三年北洋大臣准法國公使白蘭列論單三條第三條內稱教士並非官員不能干預一切公私事件其本意在勸人爲善如用稟呈訴確係理直之事地方官立與秉公辦理光緒十三年經總理衙門議准凡奉教者遇有私事悉聽地方官審斷教士不得干預各等因歷經奏明咨行直省辦理各在案嘉言謹按以上各節要一則曰教士不准絲毫干預地方公私事件再則曰教士並非官員不能干預一切公私事件並稱如用稟呈訴確係理直之事地方官立與秉公辦理云云似此法國國家視線所注是明認教士不有干預之權而猶恐教士良莠不齊動與地方官因事齟齬自負平等故必扼以用稟呈訴夫曰用稟曰呈訴蓋指教士確係地方傳教之士非若外國官員可比昭昭然矣不寧惟是且恐教士又有非分屈情之事請託於地方官故必要以確係理直之事方准與辦夫曰理直又曰確係其宗旨正大不敢深信教士盡屬安分已隱然躍於紙上外交家曷不深長思耶無奈中國風氣未開公法約章尙未頒布地方官有終其身不見公法約章隻字者偶值教

堂事件訟於公庭既不揣本復不訊末一味惟該地方教士云云教士名片一來而案件未傳者即改傳爲提未結者即威逼完結其種種讓成交涉重案雖係不肖之教士違約出頭干預而亦地方官對於各教士有神聖不可侵犯之畏心以致耳爲今之計是宜將往昔各國送到傳習各教文件搜檢齊備照會各使臣彼此重行增減頒發通行以收民教相安之實効在文明各國斷無不允之理此不可緩者又其一

一編訂地方官簡明教務准駁書 查中外互市以來交涉之繁除通商外而教案尤爲最著夫往者教案之起約誓之成藏之秘府定於上峰無論何等社會始終皆不窺其全約既身膺民社欲事研究外交者每多苦於無從購置即能購得者不過坊間各種約章拉雜成篇掛一漏萬所在多有就如前歲項城袁宮保頒發州縣教案簡明要覽誠爲當今扼要之篇惜各省均未刊頒布辦理教務者猶多向隅之憾袁宮保知其然也故又命顏觀察編纂約章成案滙覽一書行將告竣其中體例若何雖未受讀而既名匯覽要其體用兼賅必爲中國約章之冠夫羽毛不豐滿者固不可以高飛約章不完全者固不可以佐理然今日教務求速效起見完全之約章固不可少簡明之約

章又必不可無何言之完全約章繁可作援引考證書用簡明約章略可爲交涉便覽書用二者不偏廢斯相得益彰矣況乎今日州縣尤非昔比昔日州縣之事秩序井然成例俱在今日州縣之事日新月異頭緒紛如加之內地教堂所在皆有身爲民牧者非平日研究約章有素善於援引萬不能措置裕如是編訂簡明教務專書分別准駁各條尤爲今日州縣辦理教務第一入手之要不然教堂事件一來心無把握視之如神明畏之如狼虎勢不至州縣所轄境地而爲教堂勢力範圍之圈不已此所以不可緩者又其一

雖然凡上所擬善後教務四則本係草茅芻議無補高深然嘉言入都之時正值南昌教案提京開議之時而終日皇皇愧奮交集爰不揣冒昧謹貢一得以求達各忠其君各愛其國之目的斯稍稍慰已抑嘉言尤有請者方今朝廷力行新政各國環伺日深交涉繁難較前尤甚擬乞迅設外交儲材館一所博選通才編訂各種分類交涉專書奏請頒行俾內外大小臣工辦理交涉者庶不致畸重畸輕釀成巨案上貽君父之憂下愧臣子之職大局幸甚地方幸甚嘉言性情迂拙來自田間不諳體制是否有當伏

乞訓示施行無任願越待罪之至

是書於四月二十日郵遞二十七日蒙那中堂聯侍郎唐侍郎遣差官持三公名片到館請其赴部談話越日前往外部比承那中堂以優禮接見互談一小時許其謙恭和藹之態溢於言表并諭差官引至朱雷二丞參處暢談政見旋謁朱左丞晤叙數分鐘即辭出可見戊戌變政以後內外各大臣頗有集思廣益之政概不然區區一知縣之書奚足動人耳目書此壘爲中國前途賀謹附識

上都察院代奏治東策

宣統二年十一月十八日呈

呈爲韓國已亡危及東省謹陳對外治內八策懇請代奏事竊維天下興亡匹夫有責有備無患經訓垂箴誠有備爲不亡之策而無患乃真興之基非泛泛理論也必有知己知彼之定識不屈不撓之精誠方可與言籌備非拘拘成例也必有目光四射之人才左右世界之手段始可漸泯隱患今何時乎環顧中原俄日逼近於東北英法窺伺於西南其他如德如奧各強國在在皆有喧賓奪主之勢我國稍一不慎鮮有不楚歌四起者綜各國之野心其最躍躍欲試者莫俄日若而俄與日之比較又莫如日本爲最本年春知縣曾往日本視察一周觀其口如蜜腹如劍之作用無一不包藏禍心前之所以不敢公然發難者恐與俄再起波瀾今無慮矣日俄新協約宣布矣日韓併邦揭曉矣前此日本以韓爲藩籬者今將以滿洲代替矣前此日與滿間接地壤者今轉直接地壤矣前此僅一無賴日人插足內地者今又多一無賴韓人矣在日本惟恐直接交涉之不多而我國多一直接交涉即多一直接損傷是豈人才之不敵歟抑亦國權之未強耳言之可爲浩嘆夫論國權之強亦非一朝一夕之故今既如此其能聽其

不强而任人宰割乎抑一面力圖自强一面公同籌備易不强而馴致於强乎吾知我四萬萬人民斷無喪心病狂而願爲韓國之續者此理可深信也然則公同籌備易不强而轉爲强者非口頭禪也必洞悉各國之情勢某國宗旨何在必熟權東土之邊防某項亟宜籌辦而後再研究对付方針抱定急進主義庶或有濟否則日言調查日事會議恐光陰虛擲轉貽敵人不我待之虞知縣忠愛之忱與生俱有明知位卑言高之罪不得不效野人獻曝之誠敢就管見所及分別對外治內各四條敬爲我皇上我監國攝政王披瀝陳之

一曰速聯與國 凡國於地球上無論強與弱斷不能孤立寡助自絕生機猶人立天壤間無論君子小人亦斷不能無二三知己以相友善中國至今日非鎖關時代可比若拘成例以處常世是猶執古方以醫今病未有不殞命者矧日俄新協約已成立於今日耶談救國者咸以聯美爲最相當之政策夫人皆知之矣所有問題未解決者特英與德耳就表面觀之英國與日爲聯盟之國而德與英爲仇讐之國然就事實上驗之英之所以與日聯盟者爲俄耳非爲日也茲日既與俄重尋舊好將來俄在東清一

帶發展勢力由蒙古而及西藏自不待言謂英能表同情決不敢信何以見之見英欲投大資本於錦愛鐵路故耳幸事爲日俄梗阻其心當更爲之一渙此英應在可聯之列至於德雖在山東佔有勢力而環顧列邦除美國外鮮有與之洽協者近年來德在東三省亦欲極力擴充貿易我能趁此時機與之聯盟亦可多一抗日俄之助孟子云得道者多助失道者寡助今中國不得不權宜多寡之間以稍紓三省殘局俾得急事整頓內政爲眉睫之救援此聯與國當以美爲首要美聯而英德自易就範矣否則游移莫決恐日人先我著鞭此外交家所宜急起直追者此也

一日嚴詰協約凡天下事不爲己者不勞心今日俄二次協約已通告矣無論其內容較樸資茅斯之協約輕重何如而其爲東三省擴充勢力決無疑義我國稍有心肝者莫不視爲己事獨不知外交家事前既未準備事來又不詰責其真別有心思別有手段以駕馭之乎今閱報載新協約三條表面上似近和渾然以視第一次之協約尊重中國之領土保持開放之主義何以絕然不贅一詞所謂司馬昭之用心路人皆知矣況世界各國皆測日俄此次協約不僅此區區三條已也我國亟宜借此疑題嚴重詰

問限期答復以釋羣疑彼日俄而果有另約也其以無答之亦可爲後來問罪之証據彼日俄而果有另約也其以無答之亦可銷今日列強之雄心質而言之無論協約外之另約有無宜申詰問即此三條之協約與前此不符之故亦宜行正式公文使其聲復斷不可置之不議不論之列視根本重地與台灣朝鮮等觀此秉國均者當然之急務也乃何以至日韓併邦後仍闕然無聞無怪乎列強笑我中國無一外交人才也詎不痛哉詎不羞哉如謂國勢不敵譬人行路然寧可走而傷足萬不可存一懼傷足之心而不走也此其理宜無不明者奈何我國人竟昧昧若是

一曰熟審敵情 兵法云知己知彼百戰百勝旨哉是言以之臨敵敵無不摧以之當國無不强而於今之中國尤當師其意焉我國自互市以來交涉屢屢失敗無他皆不知敵情存一畏心階之厲也詎知二十世紀之時代雖爲併吞時代而尊重人道尙爲列國藉口之名詞我苟察往知來不予以併吞之罅隙特開貿易之徑門當亦列強中心所歡迎者謂予不信請觀聯軍入京之收束當恍然矣然此皆繼論列強昔日之大概也至於今而時局又爲之一變而日俄兩國之時局尤變中之一變當軸者既不

能左右各國設法破壞聽其自生自滅計己左矣迨至去秋日本伊籙博文赴哈爾濱會晤俄國科克淑夫時識者早知其日俄新協約將出現於世界矣而我國又如醉如癡猶素絨人之視肥瘠無關痛癢不思抵制卒令今日新協約甫經宣布即收日韓併邦之效果嗟乎彼何以明我何以闇若是其極有心人能不長太息哉雖然事已如此夫復何言竊謂今之對付列強競爭宜區別爲二一爲貿易之競爭一爲土地之競爭如英如美如德如法如奧等國大別爲貿易之競爭而連帶土地主義者如日如俄大別爲土地之競爭而連帶貿易主義者貿易競爭茲不贅述請單言土地競爭我國欲對付土地競爭當先審日俄所抱之意見與現狀作何歸束方可與言對付否則糊思亂想七手八足徒見自擾未見有濟也然以意揣之論日俄於今日固爲言歸于好之日俄而一思大彼得之雄風受遼東之辱分已得之羹報復之心斷不能消除淨盡不過偶一休養待時而動謂常與日善誰其信之即就日本現勢而觀國以內災患薦臻饑民甚夥國以外台民不時蠢動韓民更不問可知欲一二年間帖服投誠恐無是理幸而他邦無事尙可藉兵力以鎮壓新民不幸而外衅一生勢必處處受敵謂日爲可

怕之國在今日更不敢信是在外交家別具隻眼萬不可事事退讓致令虛聲收其實利脫遇交涉不可解決之秋彼必以自由行動四字恫嚇我既先聯與國以厚其援自應以平等對付手段應付之應付之不退以至決裂必有第三國出而調停之然既調停之交涉解決時必有雙方之利益斷不能任他片面的誘去之此可深信無疑者況日本雖有聯盟各國之名其實毫無利益予人之處人又何樂而爲之輔助大抵如窮人處世全恃鋪張門面哄嚇詐騙而已將來日本外強中乾之萎症必有不可收拾之一日非過言也驗之天心人事當有如是者

一曰確定政策、語云孟圓水圓孟方水方千古治國者必有一定圓方政策俾上下四旁皆有遵循斷無朝三暮四今是昨非徒亂秩序阻碍推行今中國政策究竟主圓主方不惟局外人莫知所在即詰其局中者恐搔舌莫對然而此可施之於閉塞時代不可施之於開明時代可施之於太平無事之秋不可施之於外侮憑凌之秋今東三省尙得謂太平無事之秋耶既不得謂太平無事之秋而日俄虎視眈眈其將用何政策對付也此問題萬不可不亟亟解決者竊觀人之待我大都謀定而後動我之待人

大都臨渴而掘井幸而掘之得泉尙可止渴若掘而不得鮮有不受虧損者東三省既爲根本重地一切措施當決定何策能補救何策能挽回積極從事庶可爭生存於旦夕否則不堪設想之險象恐近則出現於鴨綠江鐵橋與安奉改軌鐵路告竣之日遠則出現於宣統十三年滿洲鐵路交還之期朝廷不欲救東三省則已如欲救東三省舍內而組織責任內閣外而速開國會以公同之政見執唯一之進行斷斷不能有濟是在當國者放大眼光屏除私見亟亟爲之可也以上四條皆對外之要策試再言東三省治內四條

一曰釐定移民辦法 中國全境東南民衆西北土廣自古已然故屯田營田之策籬邊者無代無之降至今日移民之說幾騰全國而尤以東三省爲亟亟然東三省爲移民之要區固有識者所公認而其所以移民之法亟宜旁參日本北海道之已事預先研究以期日進有功知縣觀近來黑龍江難民就墾之現象思得兩種辦法一種就地編製移民法使在各原籍受災之地編定某戶願移自一號至百號或數百號由各地方官編齊造冊申送該管督撫咨照東省接洽庶免中途反復往返徒勞以收密集之

效益一種到東制限移民法各省饑民自行來東者非由山海關出境即由營口入境法宜在此二處設移民局各一所訂定移民資格章程出示通告無論舟車裝載饑民到境以後均須赴局掛號或由局招待派員查詢何戶願移何戶不願移分別資格填給執照使其安心就墾或就賑免蹈良莠不分反滋弊混似此兩種大概辦法實行規定在饑民未來者必聞風興起即饑民已到者亦可先行自揣默定方針以視疏散強免來往無常當較勝一著是在董其事者好自爲之也

一曰趕築東西兩綫鐵路 東三省自俄路與日劃分後漏卮日甚主權全無殆不可言狀我國欲補救於將來並行綫條約既不許勢不得不另擇地以代謀於是始有錦愛之議起夫錦愛綫長有八九百英里其間種種問題非運用靈活不能即時解決即決亦祇得謂之西綫可以便利西北至黑龍江一帶而於東至延吉即日本謂之間島一隅絕無保障又將何法以鎮守若不早爲設置將來日韓僑民愈衆反客爲主勢所必然況日本間島名稱至今未除其心尤可想見擬請西綫錦愛鐵路解決即當創築東綫奉延鐵路與京奉鐵路銜接一氣無事則轉輸各內地生貨開拓各沿綫礦產有

事則內省運兵輸餉絡繹不絕吉黑兩省亦可由錦愛路呼應靈通而延吉等處不惟不孤立且可挫日人之鋒與東邊之利一舉數得莫善於此而難者曰善則善矣目今度支告竭上下皆然此論不過祇成畫餅而已曰是殆知其一之論夫印度埃及之亡亡於國債德法日本之興亦與於國債是在當事者之善用與不善用已也今茲兩路建築當區別借債方法以期速成錦愛路擬借美欸奉延路宜招華僑兩路並修三省斷無不保之理況道與時爲變通借債亦宜因地以措置萬不可拘泥俗論以貽人進我退之害是爲第一入手之要著時不我與願當國者猛進無疑

一曰提倡製造工藝廠 查奉省自滿洲鐵路告竣後外貨如棉紗如洋布如玻璃如洋紙以及各種消耗物品在在皆輸自他邦每年金錢外溢統計不下數千萬萬以數千萬萬之金錢若能自行創造各項工藝則三省金融機關當不知若何活動夫何有外幣之充塞夫何有市面之恐慌今議者動謂開礦爲發達生產不二之法門詎知交通未便機器何來成本孔多收效難必故不知人工機器互相爲用多一製造工廠即多挽回一利權並可多資無數貧民生活往觀日本各工廠除株式會社外各內地小

工廠最居多數廠舍並不宏壯容納亦無多數技師如東三省府廳州縣各能建一普通工藝廠則各屬人民就地取材自多便利又何至需他邦品物致外生成況三省民智漸開此種利權咸知爭挽惟望在上者力爲提倡不一二年間工廠當能林立此由小而大由粗而精實行派者之必然秩序也若徒尙高遠之論招股若干萬開礦若干處其言未始不耐人聽聞而試以現時實際按之三省能否辦到恐不如各小工藝之捷足先登最易收效之爲愈也是在提倡者之力行何如其

一曰實行籌辦預備巡警 東三省巡警創自光緒三十一年因鬪匪猖獗城鄉一律成立每縣多則五六百名少亦三四百名不等就奉省而論每屬以四百名均算全省當不下二萬名左右吉黑兩省人民雖不若奉省之衆合兩省之巡警當足抵一省之數約共有四萬名此官家不費一錢已成警兵之概數加以本年續辦預備巡警曾經奏飭通行在案當事者果能實力勸導每縣以二千名計算三省又當不下二十萬名合之前辦巡警四萬之數若再加之以訓練束之以規章則國帑不費分文瞬息間即能坐收如許之勁旅以之治匪何匪不治以之禦侮何侮不禦即以知縣治康而論本

年夏秋兩季已成立預備巡警五十八防馬步隊計一千六百餘名現在尙擬擴充其能至二千名之數意中事也所慮者軍械缺乏倘能在奉建一絕大鎗彈廠源源接濟尤爲當務之要需是預備巡警不惟可保治安且可爲陸軍之後盾不能不亟亟實行者此也以上四條又爲治內要策 知縣留奉五載兩宰邊蒙目擊東省土地之遼闊人民之稀少與夫日本安奉鐵路之進行鐵橋之建置以及上月間該內閣桂太郎提議募借外債改築東京至馬關寬軌路線欲與朝鮮安奉諸路聯絡一氣其設心在在叵測皆有朝不保夕之危狀知縣亦中國國民一分子在東既有見聞問心豈甘緘默區區愚慮所及罔知避忌用敢冒昧瀆請據情代奏惟聖明採擇迅速施行無任惶悚待罪之至再 知縣係留奉人員此次因交卸康平篆後請假赴漢措資道經京師合併聲明謹呈

是書係八月間在康平任因報載日韓合邦謹參妄擬先是印送督憲錫代奏未果旋即交卸請假入都親到都察院面呈代奏迄今仍無效力故敢錄存用告當世留

心東事者 宣統三年二月附識

查

墨力

禁

煙

日

書

緒言

鴉片毒物也禁鴉片善政也余五年前上兩江周制府去毒書不過提倡禁烟之一部分耳詎知世界愈進而愈文明生計愈趨而愈艱窘我國自道咸以來人民身命財產受此荼毒者不知凡幾而國家貧弱現象更不待言此英明如先帝嚴行禁烟之詔之所由頒也本年春升任制府徐札委前往東邊一帶曰鳳凰曰寬甸曰安東曰莊河曰岫巖等屬實地履勘務達禁種目的以符奏案於是自三月二十五日至五月十八日止途閱二三千里身經五六廳縣凡道路之困頓查勘之繁難與夫集衆演說送犯懲辦及道經韓國義州府鴨綠江對岸街市之狀況安東縣日本新關之租界均以次按日按縣陸續報告民政司使張察閱在案適因事竣謹將沿途記稿付印以備省覽且可爲東省實行禁烟之一大紀念品也已時宣統元年秋八月皖青陳嘉言嘯清甫識於康平官廨

查勘禁煙日記 續

查勘禁烟日記錄

三月二十五日由省起程至二十九日午後五鐘抵鳳凰城適程守先日晉省是夜住店寫家信寄回

四月初一日早大風大雨已刻又下冰雹午刻始晴往廳署拜謁幕友並調閱禁烟全卷已據前任談守於去春三月呈報一律禁種且查未禁以前每年亦僅三百五六十畝之數閱畢往勸學所拜訪司選員承王二君暨城守尉府經歷各局所晤叙此次來鳳切實查勘宗旨至晚五鐘冒雨返寓夜間面託廳署收發員吳飭傳四鄉鄉約來城面詢有無種戶如實無種戶即飭具結存查一以示四鄉周知此次查禁之嚴一以爲分頭抽查之實據

初二日早大霧有鄉約王關二姓來寓當將烟禁森嚴明白告知據稱伊所轄之地實無一戶種此大烟甘願具結候查去訖八鐘早飯畢帶同捕盜營兵童得勝戴鳳五二名引路乘馬赴東南鄉履勘先由東門繞温家堡李家堡渡朝河經草河沿李家堡一帶至漲家堡康家堡戴家店關家堡時已正午滿天雲起行至中途大雨紛下鞭馬疾馳

衣履盡濕飛奔約五里許至花家堡花文運家始駐馬避雨頃復雨冰雹大若蠶豆一分時始霽飲水一碗始由南道而返越大隈巔經小巖屯岳姓家打尖喂馬畢又越藍旗嶺繞門家堡旋城是日每到一堡凡該堡豆圃菜園及周圍隙地均詳細履勘勸畢再入人家將此次禁煙如何嚴厲將來如何懲辦務使家喻戶曉互相勸勉庶不至再犯夜間修信兩封一與司選員邀請明午赴宣講所演說禁煙宗旨一與城守尉請飭傳諭該九界旗民及領催人等到署聽演十一鐘寢

初三日晴六鐘半起城守尉慶與司選員承王宣講員史來答拜訖剃頭並修書三封與寬甸安東大孤山三處預請先飭巡警按區切實嚴查并取具鄉約切結存候往該境時擇地抽勘免稽時日云午初司選員復來叙少頃同往宣講所商會對衆演說至時環而立者約數百人司選員承宣講員史亦先後剴切痛陳聽者均額首稱善至三鐘始散是晚又來申鄭陳于四名鄉約甘願具結候查訖夜覽政治叢錄數頁就寢

初四日晴六鐘半起有寬甸警務長韓回省道經鳳城來訪叙談少頃十二鐘往城守尉衙門演說禁煙宗旨如前先時該九界旗官及領催人等均衣冠齊整詢以各管界今

年有無種煙地戶僉稱環城左近四五十里絲毫烏有至邊界偏僻之地則恐不免耳於是諄託各界官分頭切實調查報告衆皆唯唯稱是司選員承與城守尉慶俱熱心演說飭令各界官認真勸查不可視同具文至三鐘始散旋即順道赴巡警局回拜韓警務長未遇而返夜錄日記畢就寢

初五日晴六鐘起飯畢帶同捕盜兵戴鳳五劉海勝二名往西南路查勘越腰嶺經徐家堡王家堡康家孫家何家等堡繞至邊門街即名高麗門距（鳳城四十里安東九十里）在福慶店打尖喂馬到店後即親查出戴雲魁煙戶周才鄂色恒危（鑲藍旗甲馬）二名白晝開燈比將周鄂二名煙具拿獲到店旋傳各房東諄飭一番嗣再容留若輩定將該各犯一並送廳究辦不稍寬縱今日姑念鄉愚籍口有病特從寬釋歸烟具留送廳備查至午後二鐘在該店吃飯喂馬畢經白家堡戴家堡唐家堡謝李家等堡越長嶺李家嶺康家堡李家溝張家堡過鐵道至八鐘始返城夜間兩腿頗覺酸痛十一鐘就寢

初六日早陰已雨午晴將昨日拿獲烟槍兩杆烟燈兩盞銅盤一塊并零小件一并函送

廳署收發員吳查收轉呈備案明日擬往寬甸料理起程事宜并各處辭行晚間雇轎車一輛

初七日晴七鐘飯畢起身隨帶營兵二名渡愛河越黃嶺子遇雨鞭馬行至大堡子店避雨午後二鐘始晴又行越北黃嶺子經趙家堡又遇雨疾行至台溝嶺下鄭家店住宿本日共行八十里沿途詢各民人種烟及烟館情形均稱自去春即已禁種烟館去年尚有今年却無賣者石頭城子鎮今年二月間亦有三家賣戶及行至該鎮親查現下尙無賣戶觀伊房宅內容亦不過近日未賣歇尙未久是夜大雨旅况無聊之甚

初八日晴五鐘起行越台溝嶺長約六七里值登嶺巔見旭日東升周圍起暈知有雨勢嗣越東陽嶺萬馬石抵三道溝風雲四起即在該處賈家店打尖喂馬前進越蒲萄架嶺雙嶺子至七鐘始抵寬城德馨棧是晚冒二十餘里大雨入城寬城街道泥水均不能行走夜間仍雨

抵寬甸縣記事

四月初九日大雨七鐘起即將在鳳查勘日記并演說詞草繕一分午後二鐘始晴四鐘

又兩比晚即遣紀向縣署片借馬封稟封各件夜間修稟信一封將各件封固送交右堂帶省面呈十二鐘始寢

初十日晴十鐘往縣署拜謁畢復至右堂勸學所兩等小學堂官膏局各董晤叙此次來寬查勸禁烟宗旨至午後二鐘始返晚間往縣署便飯並調閱種烟舊卷始悉三十三年馬令任內共有烟地三千四百餘畝三十四年春經趙令出示嚴禁一律改種雜糧不准絲毫偷種曾於四月間呈報公署有案繼趙任者朱令亦嚴禁如故並聞懲罰多數去夏已無種戶夜間周身骨節酸疼似受感冒至十鐘就寢

十一日晴晨起即赴城內外私自查詢烟館烟地究竟實行斷絕否本城烟館早經官膏局查禁淨盡四鄉烟地亦於去年禁絕現在設燈私賣者只官膏局一處嗣經赴該局面詢該執事呂姓稱因過客買膏無處吃食者偶有其事及觀該局房屋另有空坑兩副想係吸烟者所用且該局并有分局三處旋即赴縣調閱官膏局卷宗始知創辦人呂廣義在馬前任內稟准趙前任內開辦至去年七月間朱前任內復稟請在局設燈專售往來行人吃食當經朱令批駁未准而該局任意延宕至今未改想亦假托去年

一稟之故前在鳳凰時即有所聞茲果如是實屬不成事體已函姚令趕緊一律禁止另籌辦法姚令已允實行至夜撰演說文一篇十二鐘寢

十二日晨霧十一鐘同姚令往勸學所內宣講所演說因抵寬次日即向該所董事懸牌一方訂定星期日演說禁煙宗旨本日到所時環而立者約二三百人少頃即登臺詳說此次查勘禁煙如何嚴厲不但今年已也並將在鳳演說底稿與此次演說稿給大衆參看務期人人存此自禁之心次姚令演說吃煙種煙之害並學務各節多中肯要至午後三鐘始散復同姚令到署傳有鄉保多數面諭永遠不能再種大煙之理由各鄉保均稱去年即無種者甘願具結候查比飭照辦訖夜覽政治叢錄數頁就寢

十三日陰晴不時九鐘帶同警兵二名頭戴草帽身騎壯馬往東南鄉履勘出東門越歡喜嶺土門子土門嶺至棋盤溝寬掌棋盤嶺楊姓家打尖喂馬復由該嶺繞至長鷹之牌傍晚入南門返寓所到之處多零星散戶均嚴諭如故夜間會同姚令出具印結并辭行十二鐘寢

十四日微晴五鐘起因雇車無着片借姚令小車並警兵二名護送至長甸河口沿途山

石橫陳車中顛簸頗難忍受其寬甸縣共有六甸名稱曰永甸曰團甸曰長甸曰蘇甸曰賀甸曰寬甸等巡視團永二甸均係石城堆砌高約丈許縱橫半里上下惟長甸係土城該處尙有店鋪十餘家名長甸街距長甸河口有三十餘里車行五里許渡河馬驚車夫落水車幸未翻再行十餘里在山溝亂石中車馬翻跌人幸未傷右左臂擦皮一塊至六鐘始抵河口鎮福泰棧當查該鎮商店大小共二十餘家有分縣稅局補徵局駐此夜間即至分縣王(山東人)稅局梁子真(山西人)兩處晤叙少頃並查該街烟館名雖未賣其實下流社會之賣烟戶仍屬不少己面函王分縣嚴行查禁並飭該巡警一體協拿當夜十鐘梁王二君均來答拜十一鐘寢

十五日晴五鐘起買舟解纜出小虎拉山口九鐘抵荒溝有長甸分卡一所人煙共三家

俯山岸而立距

河口安東

各六十里溝以下有虎山與高麗義州城相對峙時十一鐘舟至

該城北門山下三里許小鎮停泊該鎮有高麗稅局一所聞係日本包辦遼帶同舟子步至該城內走視一週該城人烟頗衆房屋矮小就地鋪板寢食皆在此雅有日本風過義州府行至中街各店門首均懸本國八卦國旗不知其係何節慶迨越中街壯邊

樓見有匾對一副橫寫(祝大韓帝國萬萬歲)直寫對聯三付(關廿四紀文史之弊輪六大州新鮮之功)(鼓動獨立之氣力喚起愛國之精神)(光線恰照人智開發風潮一變文化大進)云云始知其爲學界開運動會於是即隨該處往觀者至南門內運動場至時國旗飛揚人聲樂聲四圍喧奏頗稱熱鬧惟衣旗均尙白色見不甚慣學生運動亦欠整肅該場門用松枝紮束上寫義州聯合大運動場八字男女圍觀者約數千人視三足競走畢即步行返舟解纜至五鐘始抵安埠住財神廟街第一樓客棧姑誌此以見韓國今日競爭現象之一斑云

抵安東縣記事

十六日晴九鐘往縣署東邊道署暨各局所拜謁均未遇惟戒烟所兩等小學堂商會三處接晤到商會時適值該會開議人數約有二百上下乘便即將此次查勘禁煙理由對衆詳說有協理王某言安埠中國地面尙遵法律惟日本新關市場係中國禁煙通逃藪烟館林立烟地一片可發一嘆云云午後五鐘鄒令來寓亦如是云云比向鄒令借馬兩匹草帽一頂擬親往該日本地察勘一週夜間寫信兩封並繕寬甸日記十二

鐘寢

十七日陰晨將日記冊封送郵局訖縣署送來馬匹草帽並警兵兩名十鐘往日本新置地履勘由七道溝起至六道溝止共地約有二萬餘畝建築房屋闢成市場者十之二三餘皆租與兩國農民種植今已種烟者約有二百畝上下皆苗長三寸許次由六道溝口日本界石起上寫(大日本軍政署)六字入中國五道溝過帽盛山行至余家店打尖尙未見有烟地午後二鐘遇雨即返衣屢濕而未透順道即往縣署調取禁烟及烟畝冊回寓夜間查閱該卷三十二年間冊報烟地僅三百數十畝三十四年四月間早報一律改種雜糧惟日本新闢地之種烟畝有無尙未聲叙十一鐘就寢

十八日晴大風本埠元寶山娘娘廟會香烟甚盛男女往游者人山人海迷信頗深乘馬往六道溝至五道四道溝一帶詳細察勘日本人自種烟地均難詢悉僅詢該處鄉約報稱中國種煙戶得三十多名地約五六十畝比飭開單早報縣署並商鄒令先行呈報道憲俾使據爭斷絕且至五道溝趨廷獻住宅旁見有烟地約畝許比擬帶縣懲辦嗣經一再哀求甘願即時毀拔姑從寬飭改種並面諭該鄉約于振江親督毀去淨盡

至四鐘始返夜間往商都令明日飭差往勘是否毀盡稟復即回寢

十九日晴晨起撰演說文一篇並將鳳凰寬甸兩處底稿封送本埠商會公覽俾便勸諭
十一鐘乘馬帶同警兵往九連城一帶勸視行至大沙河子隔一衣帶水仍乘馬渡河
詎乎河心馬忽臥水衣履盡濕就在河中走至岸上童姓小鋪將衣履脫盡借該鋪中
破短夾襖披遮尙乏中衣又將鋪坑上破單氈毯圍住下身急遣警兵回街檢取衣履
至午後二鐘始到換馬返寓晚間至浴堂沐浴訖即寢

二十日晴十鐘雇車復往九連城一帶履勘仍渡大沙河越通天溝珍珠泡老龍頭中江
台九連城沿途勘無烟地至該城大順店打尖隨帶跟兵步至該城查該城係屬土山
并無城可觀不過昔年有土圍九個接連稍有形勢登是山時居民均指對江係高麗
義州城往年中俄兩國與日本接仗均由此失敗日本對江用木板繫練浮水而過云
云且該山城東北有虎山西北有三道灣虎山之西九連城之東各距不遠有山墩一
坐名擺渡口山上有日軍士死墓兩層(聞土人言死骨已用舟裝回此係假塚)均立
有石碑至午後二鐘由太平川栗子園返寓

二十一日晴十鐘赴縣署面諭傳來各區鄉保飭令該管地內有則舉報無則永遠不准再種比據各稱甘願具結候查訖隨往道署稟辭並稟見道憲將安東查勘各情形一面稟且將三處演說稿呈覽訖一面差片到縣署辭行

二十二日晴由沙河棧起身越通溝嶺至河深溝打尖(四十五里)午後一鐘進行二十里至鳳凰南邊界再行二十里至大房身住宿以上各處地內均產有土煤寬長約數十里亦土產一大宗也

二十三日晴大風四鐘起行五十里到龍王廟打尖(屬鳳界)該處適演火神戲抵店後卽詣演戲台下巡視一周尙無烟館賭博差強人意迨至市中各胡同巡閱一過查有壹百零四號門牌劉基一戶家中坑上尙有煙具陳設且燃火光正在吸食之間卽入室將烟具拏交該處巡警分局宋巡官酌辦並傳該處鄉約面飭嚴查如再有犯務卽送廳罰辦勿得徇隱至午後一鐘吃飯畢又進行五里許渡仁旗溝將車馬推上公渡而過至七鐘始抵大孤山復有店住宿人頗疲倦頭皮撞破腫甚十鐘即寢

二十四日在店休息一日寫稟信交郵局遞省

抵大孤山莊河廳記事

二十五日陰雨晨起往拜姚分司晤叙禁煙事宜據稱大孤山地近海濱土舍城質向不宜於煙種早經傳飭各鄉牌巖禁具結在案竊思地質如此自屬實情煙館偷賣恐仍不免晚間同姚分司補徵局潘紹常三人步至孤山天后宮關帝廟地藏菴層級而上憑眺對江各海島形勢大小共有十六島之名稱此山對面僅有鹿島小島子聞皆有民戶居住其餘諸島或屬莊河或屬金復兩州惜無暇往游耳謹將各島名記載於下俾異日談海防者注意焉自東而西首巒島次鹿島次海羊島次大王家島次石城島次鳥嶼島次大長山島次小長山島次廣陸島次狝樹島次蛤仙島次耗子島次鑾子島次小河島次小青島次小王家島共十六島中惟海洋島水深且大日本常有輪舟泊此石城廣陸大小長山四島縱橫約三四十里大孤山鎮人烟頗密大小商店共有二百戶上下惟商務因江河淤塞海舟不能抵岸以致日就衰落耳惜哉該處旱甚居民求雨孔急夜間寫安東日記冊竣寢

二十六日陰晴不時晨將安埠查勘日記送交郵局訖十鐘起行七十里至石咀子店住

宿一路微風細雨頗覺寒氣逼人且沿途經過土面均出有土煤堆積成山其色黑其質如泥晒乾能作柴薪尤能作肥料願研究農學者注意焉

二十七日晴四鐘行越小孤山七十里抵莊河廳到處找店均無住處嗣至恒興糧棧婉商多時始得允諾噫行人至此可慨也入棧後該廳正值求雨官民同赴海口龍王廟拈香晚七鐘官始回衙

二十八日晴十鐘往廳署勸學所商會警局拜謁均晤叙少頃午後三鐘始回棧傍晚時在棧門首站立見對門一荒鋪內出入人頗不少均面帶煙色試一近窺果係開燈售烟當飭人將烟具拿出觀其門牌係趙士鎔一戶比即將煙槍一支煙燈罩一盞煙泡兩枚銅煙盒一個一并函送廳署酌辦是城煙館多家巡警從不查禁亦可異也因指此煙館係崗兵站立之地詰其何以不查拿該兵稱未奉傳諭云云八鐘廳署邀吃便飯同坐共四人至十鐘始回棧寫童王二君信訖即寢

二十九日晴晨將信件交局訖即向廳署借馬匹草帽同營兵二名往鄉查勘十鐘出門經砲台子王家堡等處越史家嶺馬忽誤失前蹄人由馬首落下左腰眼近下股骨

與左臂均受微傷幸該處尙無亂石伏地少頃由兵挽起步行五六里再乘馬至水車子地方劉姓家雇人推按傷處約二小時許復行至東屯見有烟地兩塊約有二畝上下當飭兵各拔煙苗十數顆裝入馬袋始詢該處人民乃知劉可仁呂長齡二家所種其他不及細勘隨乘馬由大姜家屯官馬山燈台嶺小姜家屯鍾家堡入西門而回時已七鐘即函向廳署索取七厘散三黃寶蠟丸和酒而飲一面又修函將煙苗封送廳署請即傳辦乃因該廳屬四鄉種煙之戶尙不在少數不得不懲一以儆其餘耳十鐘又飲數七厘散二次始寢

三十日晴晨飲七厘散一次傷處頗覺腫痛尙無大礙十鐘西路區會長五人來棧當即接見面詢各管區內有無煙地僉稱須回家細勘一次再敢具結比即允其速查限日來城具結候我復查云云午後三鐘陳牧來云種烟戶已傳到售烟人在逃比即告以四鄉種煙者頗多應請嚴飭各區巡警挨次巡查園地來案具結方有把握陳牧唯唯而去夜間借來日報數紙以消旅遣十一鐘飲七厘散而臥

五月初一日晴晨飲散如故寫稟信一件郵呈民政司係報告莊岫兩屬煙地頗多查勘

尙須時日合先稟慰云云十一鐘陳牧又來探問去訖勸學所孫斗南君由鳳凰投遞選票回答拜晤叙少頃其人頗具熱腸晚間赴勸學所回謁孫君彼此叙有數鐘之久並面託在教育會門首懸牌訂明初三十鐘宣講禁煙宗旨十一鐘始回棧飲七厘散而臥

初二日晴晨飲散一次午間陳牧過問因告以初三日全赴教育會演說昨已與孫君訂定云云傍晚孫來棧將前在鳳寬安三處說稿安去油印預備明日散給大眾孫君去後復撰莊河現在情形說稿一紙補送孫君處合印以便臨時散給俾衆周知此次查禁煙地當以劉呂趙三姓爲戒十鐘飲散而臥

初三日微晴晨向廳署借馬兩匹吃飯後赴教育會所陳牧已到各路警長均衣冠共有二三十名之多餘均商農兩界人民入所少頃即登台演說此次禁煙如前並將現獲劉呂兩姓煙苗趙姓煙館一併送辦在案各情形反覆痛陳務望大眾均以劉趙呂爲戒次陳牧接演次孫君接演俱各苦口熱心當時環而聽者約五六百人之多是日四鄉求雨者不少莊河有此一番懲處庶乎能絕根株演畢後各區會長合詞求限各自

回家巡勘一次再來具結今日不敢妄具云云比全陳牧允准三日具結後聽候復查訖至午後三鐘始將印刷演說紙分手散給陳牧先回衙門嗣承孫君再三留在會所吃便飯一人歡飲數杯至五鐘始回即函取廳署煙畝冊並官膏卷宗詎該廳係新設治畝冊全無僅孤山官膏卷一束閱畢送還即寢

初四日清晨大雨民望青慰臥起後因不能下鄉即將大孤山至莊河數日日記並演說詞用格紙抄錄以免到岫再錄傍晚陳牧函邀明晚六鐘赴署小酌夜間鄉思觸發口占客裏過端陽絕句數章聊以自慰寂寞云爾

初五日端陽佳節日光微吐早起稍吃茶點即差帖至廳署賀節午正由本棧王執事禹慶邀酌午觴同座共四人六鐘赴廳署飲觴同座共五人十鐘回棧又口占絕句兩章自感並差紀向廳署借馬兩匹明早要用因聞西北鄉一帶種煙者不在少數姑往一次以驗確否

初六日微晴天明時周身微覺發寒傷處僅見骨腫不按不痛八鐘吃飯後遂帶同警兵勉往一次出西門由青家堡越徐家嶺王家籃子東爪川大營子前後泡子沿石家壩

子至太平嶺打尖復到榆樹房等處走東道至伊家店遇雨約二小時迨雨止起身天色不早黑雲四布人馬俱倦至夜十鐘始回約行二十餘里之黑路本日所到各處均有烟地烟苗有已拔者有剛拔者有迫令當面拔者有尙未拔淨者實屬查不勝查此外有朱家窪子大房身等處聞人言烟地亦多因雨未往只得開單報告廳署核辦一面趕往岫巖查勘因烟苗將近開花過此恐不及耳

初七日微雨晨起後周身酸軟勉吃稀飯兩小碗乘馬赴大房身地查勘昨聞之言是否確實詎至該處果見有烟地兩塊拔而未盡尙留遺苗數十顆當飭兵盡數拔回詢悉地主一係陳永祥一係孫姓忽遇大雨遂返夜間往廳署說明並請迅速搜查淨盡爲要比即辭行擬往岫城回棧即寢

初八日晴四鐘吃飯五鐘起行五十里至大營子打尖復越土門嶺大小雙塔嶺子石頭嶺子至寶聚店住宿仍屬莊界是日行至大營子道旁見有烟地一塊尙留烟苗一顆當飭拔去晚寓寶聚店巡視西頭房前園地雜有烟苗數十顆詢悉地戶係王佐廷年有七旬口稱菜地遺種(俗名二茶子)並非有心種此姑念菜地內夾出當令即時拔

盡從寬免究並諭永遠不准再種及演說禁煙理由

初九日微晴四鐘起行越黃嶺子四十五里至蜂蜜嶺子打尖十一鐘又行越紅泥嶺子爬虎嶺午後三鐘半抵岫城興順店是日共行九十里共遇雨三次行囊稍濕雨傘被風吹去到店後即步至城內外出其不意探查烟館情形詎至南門西見有陳烟館照常售賣又泡子沿順烟館內吃烟人甚夥一時不及細拿僅拿烟具多數又州衙門對面王煙館自恃其母年邁隨吃隨賣均獲有烟具開單函送州署傳辦七鐘代理賀牧來拜云已傳案責懲當向賀牧告以此次甫抵真境行此手段未免粗率然爲厲行烟禁起見又不得不如此如過此一刻人人知有查烟委員到境恐即互相隱飾矣祈曲諒之

初十日晴晨起後右目紅腫在廐休息一日僅草寄莊河並省信三件

十一日雨晨起後右目微愈將莊河日記並說詞抄竣修稟信一件封送郵局訖午後一鐘往拜州署暨城守尉勸學所商會兩等小學堂各員晤叙此次查勘種烟理由並面訂明日借商會演說屆時務請諸公同去四鐘返廐撰說詞一道送勸學所油印以備

明日當衆散給夜大雨十鐘寢

十二日陰雨纏綿函知勸學所各界改訂次日赴商會演說午間調取州署估徵烟畝冊知三十四年種戶共一千一百餘家烟地共一千一百三十餘畝今年不其多見全係代理賀牧之力夜間因右目紅腫未退盡十鐘寢

十三日微晴十鐘全賀牧赴商會演說到時城守尉暨九界旂官領催人等商學各界約有五六百人先茶叙少頃即登台演說約二小時許次賀牧亦演說一小時許衆皆稱爲此乃中國絕大好事自宜同心協查禁絕云云至午後一鐘始散三鐘又大雨不止夜間忽放月光

十四日晴晨起後即往城內外各菜園勸視一周查獲城北前林家園子後林家園子褚春林大麥地內官家屯官姓包米地內各夾出烟苗或數十科或數百餘科又州衙門後身已荒之菜地內尙有受旱烟苗數十顆仍飭登時拔盡十鐘復乘馬帶同營兵往西南路經藍旂嶺水嶺子傳家館娘娘城遇小雨至土門嶺依家店打尖又繞蘇家堡分水溝查有趙白葵菜地內夾種數顆即飭拔盡過白旂溝燕窠溝往西過瓦房店十

八付架石巔子至七鐘始回

十五日晴七鐘吃飯後乘馬出東門至松樹溝下溝查獲趙永昌煙苗三壠拔而未盡又溝外趙永富夾種十數顆當飭拔盡又繞至四道虎嶺過腰嶺走頭道干溝二道干溝查有烟地約一天多已拔盡尙未改種詢係張俊卿管業復至溝底查竣始回沿途詢據輿論均稱今年種烟不多間有一二亦多聞風而拔當夜即雇車擬明日起程旋省所有查獲各戶均另列表附報

十六日晴吃飯後十鐘起行出東門繞北街城老鴉嶺大偏嶺瓦房店至分水溝停宿共行九十里聞瓦房店後有細玉溝每逢大雨常有老山玉發現土人拾者不少此外西路有瓦溝出新山玉名岫巖石又名岫巖玉城內南門口作房有七八家工作價高十七日晴四鐘起行四十五里至折木城俗呼四面城廣裕店打尖距該城五里許有姑嫂石一方岫巖州有兄弟山一座可謂天然巧對復越銅密嶺至午飯後五鐘抵海城火車站三泰店吃飯

十八日晴十鐘抵瀋陽直至小南門外德源酒店胡同王公館下車克庵珍谷兩君均

在寓未出門

各屬演說禁烟詞稿附錄

抵鳳凰城在宣講所演說禁烟

今日來到貴地爾軍民人等誠有不知其爲何公事而來者所以昨日函請司選員承王二公訂定今午借貴城宣講所對衆詳陳此次奉督撫憲札委查勸東邊各屬烟地烟館有無種設之戶俾城鄉人等咸知此禁日漸加嚴永遠不能稍留此毒於人世夫督撫憲對於此等烟禁迭次出示曉諭通飭各府廳州縣張貼通衢嚴行申禁已不啻三令五申而此次仍派委員十餘名分往各府廳州縣履勘有無種植烟地且烟館曾否閉歇實地調查蓋恐吾民膽小者固甘心守法而膽大者或不免嘗試且各府廳州縣所轄之地廣則五六百里七八百里狹則二三百里四五百里不等地方官足跡既難遍到公事又且繁多其於此等烟禁辦理或不能周密各大憲心知其然也於是派專員以悚百姓之觀聽飭親勘以淨偏僻之根株本委員既奉檄來此責有專歸事無旁貸抵城日適貴廳程太守因公先日晉省未獲面商迺思

此等事件尤不能不與爾百姓直接宣諭俾知中國昔日積弱之原因今日禁煙之嚴厲與夫法律館議訂禁煙之專條及上海萬國禁煙之會議窮源竟委明白告知願爾衆百姓等遵守法律靜心傾聽庶無負各大憲派本委員一片之苦心焉中國在寰球上土地不亞各國之廣人民不亞各國之多獨至國勢自甲午以降每每不能爭雄於各國其故何在有心人皆謂鴉片烟毒階之厲耳官吸鴉片烟不能治民事兵吸鴉片烟不能臨大敵士吸鴉片烟浸假而滋生訟端矣農吸鴉片烟浸假而荒蕪田畝矣工吸鴉片烟浸假而游手好閒矣商吸鴉片烟浸假而傾家蕩產矣以上種種中國積弱之因要皆坐此人鮮有不知者獨今日煙禁忽爾森嚴此亦物極必反之公理先是德宗景皇帝有見及此飭令政府籌議禁煙辦法與各國訂定十年遞減殆蓋何以謂十年遞減查外國所產煙土曩運銷於中國各口岸每年約數千萬箱即作每年二千萬箱計算中國第一年禁煙起外國即將第一年之二千萬箱減運一成以次類推中國十年禁絕外國即十年減盡中國八年禁絕外國即八年止運萬一中國屆期不能禁絕外國即須索將前九年遞減之數之利一一如數補償

云自是德宗升遐今皇帝登極後首以此禁爲救中國積弱之要素迭頒諭旨嚴飭京內外各大臣呈請戒煙并飭文武官員分別已吸未吸概行取具保結存查如有隱飾違犯定即從嚴參辦有開燈售煙者人則拘禁房則充公有種植煙苗者令亦如之所以各省督撫憲奏請一年禁絕者率居多數奉天省亦是今年禁絕此派委員查勘煙禁之嚴之所由來也再近閱京報載有法律館議訂禁煙專例將次脫稿雖內容未獲卒讀而其間年緊一年迨三年後仍有犯者恐不免有棄市之條我百姓等務宜父詔子兄勉弟及早戒斷罷種共爲良善民庶以圖自立不淪爲弱國之國民幸莫大焉如謂不然何以美國見中國煙禁切實有效首先獨創萬國禁煙會議贊成中國善政於今年二月間公同在上海開特別大會議我政府亦派員數位與議現在業已閉會所有會議十餘條早經登報是可知禁煙之厲不獨中國然也而中國尤宜踴勉同心嚴益加嚴先期淨絕根株方可免口實於各國總而言之中國公事在昔視之或有始勤終怠之弊而以立憲預備時代視今日禁煙之功令萬無稍懈之理此可斷言者謂予不信請看將來之結果請看將來禁煙良善之結果

抵寬甸縣在宣講所演說禁煙

本月初七日由鳳凰城涉川越嶺冒雨衝石受幾許困難得與諸公今日敘述此次奉督撫憲札委查勘東邊各屬煙館之有無並督撫憲此次派委命意之所在以及今日禁煙嚴厲之理由種烟獲咎之科罰一一剖晰願諸公靜心傾聽以一傳十以十傳百務使家喻戶曉永絕根株庶無負督撫憲此次派委之一片苦心焉夫督撫憲對於禁煙要政迭次出示曉諭已不啻三令五申而今年於春種之始猶復札委多員分往各府廳州縣親勘一以視各地方官之是否一律實行一以視吾國民之是否一律禁絕且官不能實行猶可調也我民不能自禁更將何恃此督撫憲之意責在官而尤責在吾民也本委員到寬縣已三閱日矣沿途查詢烟禁據經前縣無趙未二公相繼嚴禁去春已不多覩今正姚縣尊又復迭出示禁想屬良善國民斷違犯之理然本委員竊有過慮者不得明白告知以堅吾民之信守查此次禁烟先是德宗景皇帝鑒於中國積弱之原因於光緒三十二年特頒詔旨飭令政府議籌禁烟章程與各外國商訂洋土藥十年遞減辦法無論如何爲難務期切實辦到

恭繹旨意所謂洋土藥十年遞減者無非先將土藥早年禁絕各國深信無疑而後洋藥自可按年遞減否則土藥不能禁絕若期屆十年試問洋藥逐年遞減之成數將何以償補此其主義深恐吾百姓等有知有不知其在知之者彼不種之心固永遠堅定其不知之者以爲今年官禁森嚴我即不種或可待諸來年鄉曲無知游移莫決誠屬難免此不得不告知者一也再近閱京報法律館議訂吸烟種烟囤烟賣烟等專例雖明文未見而考禁烟舊例尙有絞候之條此次專例罪擬加重不問可知爾等有地五穀皆宜又何必故種違禁之物干犯刑章自貽伊戚此不得不告知者又其一而況種烟之地當未申禁以前無論能否收割畝捐有稅估徵有稅何如種麥種豆種苞米之一塵不染收穫自由不受官欺不受吏擾之爲快歟此尤不得不告知者又其一要而論之烟禁日嚴一日萬非尋常公事可比本委員前在鳳凰城除履勘四鄉外復詣宣講所演說種種尙有底稿在手願給諸公參看廣爲勸導務使四鄉同胞人人存此心共起百數十年垂危之沉疴勉躋五大州爭雄之強國東三省幸甚中國幸甚

抵安東縣在商務總會演說禁煙

本月十五日由寬甸縣屬之長甸河口買舟南下傍晚抵貴埠今日走謁各當道暨貴商會原以藉叙此次奉督撫憲札委查勘鳳凰屬煙館煙地是否一律禁絕並宣諭朝廷森嚴禁令承各國多方協助公同求達目的以圖富強之盛心貴商會既居東邊開闢商埠之要區又屬鄰邦環視注意之重地一切維持補救稍一疏忽口實即來而於此次關係尤其顯然者也本委員昨甫抵境入夜調查屬我境地之煙館得未曾有足見貴會輔助維持之力有功於社會者良多迨至日本新關市場麗華茶園一帶高樓聳立燈火紛陳試一近窺短榻橫槍笑談呼吸幾有金吾不禁之況心竊惑焉時有語余曰不但此也且有煙苗種於六道溝者不知凡幾矣余隨詢六道溝係屬誰地答曰日本租置地然則日本既爲世界新文明國此次中國煙禁不惟各國贊成且美國去年創萬國禁煙會今年二月間在上海六國飯店開特別大會議各國均派大員與議而日本遣派大員醫士較各國尙占多數其日本政府贊成中國之盛心不待言矣余當未至以前以爲貴埠商務之發達中日之邦交辦

事之和濟宜較他埠爲尤便。詎人埠後觀此現象所爲使者反稱不便。其設心殊不可解。今既奉查來此竊願經理此事務所者速速改變方針。另謀種植。勿予人以口實。勿受各國以詰責。實爲私心盼切之至。此就昨今調查烟禁之大概情形言之。殊深浩歎。茲姑勿論。且說正人必先正己之主義。望諸公於吾民直接貿易時。剴切開導。曉以時事之艱難。積弱之緣始。並此次法律館議訂種烟吸烟賣烟屯煙等嚴例。以及中外會議一體實行協禁辦法。毋藉口於日本新市場之賣烟新置地之種烟。巧爲違犯。致蹈刑章。尤爲至要。即日本租地種烟租房賣烟亦不過一時掩耳盜鈴之舉。轉瞬限期斷絕。如上海各國租界之禁止辦法。必能見諸實行。此可斷言者。語云。竿正影必正。我國創設禁煙等立竿也。各屬地根株淨絕等竿正也。中國之竿果能先正。各國之影其不能正者未之有也。況乎各國會議十餘條載在上海各報。已昭昭在人耳目。斷無違背之理。此余所由鳳凰城抵寬甸四鄉。履勘逢人演說。皆抱定此種主義。尙有底稿兩紙。願供諸公參閱。廣爲勸諭。俾安東全屬之同胞各存此心。毋貽鄰邦羞不勝頂祝慶幸之至。

抵莊河廳在教育會演說禁煙

今日與諸君在教育會演說此次查勘禁煙宗旨皆不出鄙人前在鳳寬安三縣命意之外昨承貴總董孫斗南君將此三稿持去統用謄寫板刷印多數分給諸位參閱本毋庸贅但事關要政立言不厭求詳知法務使普及貴廳僻在山陬海澨交通不便聞見較遲歷據人言莊岫二屬民氣頑悍守法者固多而藐法者亦屬不少種烟之事誠恐不免迨抵境第三日躬親乘馬赴鄉行至西區水車子地方果查獲東屯劉可仁呂長齡園地各種烟苗一畝上下當飭引道兵將烟苗各拔數顆帶回劉姓苗長六七寸許呂姓苗長二三寸許其他左近一帶因去時路越史家嶺馬忽失足人頗受傷急思回治不及細查今日傷已漸痊復勸他鄉又有日矣望諸公協助一臂之力各舉所知預先開單報告容鄙人逐一巡勸勒令一律毀種諸公萬毋徇一時情面貽後日毒根是爲今日切要之務況此烟禁一縣不清有關全府一府不清有關全省一省不清有關全國我等既食毛踐土具有天良際此絕好機會斷斷不能容隱少數無知種烟之戶破壞國家禁烟大局鄙人既身膺斯責總期到一

處根株淨絕一處方不負各大憲此次派委查勘之盛心諸公如有耳聞某處種烟若干日覩某處種烟若干或用函告或往寓面述均無不可旅館靜候不勝翹企之至

抵岫巖州在商務會演說禁烟

本月初八日由莊河廳起程次日入貴境沿途查勘種烟地畝尙未得見以爲大道兩旁雖極頑之民想亦不敢玩法至於此極迨與貴州代理正堂賀竹翁晤叙始悉三四兩月間迭經派差與警長往勘數次且又親身不時履勘前後共拔毀一十餘家乃得有今日之結果聞之不勝忻喜然而鄙人尙有一言爲諸公進告者今年岫境不見種烟地畝固爲他邑之冠亦屬貴州之光而明年後年以至百年都要永遠抱定唯一主義切勿稍存希冀之心方算得始終一個好國民算得完全一塊好乾淨土即如四鄉各屯戶今年雖未種烟而家中儲藏烟種誠恐不免偷或有之及早拋棄淨盡勿再留存尤爲預絕根株之手段如其不然將來一交冬令或地方官派人查出或被入報告到官盡法懲治悔誠無及矣是何如早絕此念永斷葛藤之爲

愉快也鄙人前在鳳寬安莊四處各有演說底稿今復有所見尤不得不直言奉勸以爲中國力圖富強之基礎願諸公參看四處說詞自知禁煙厲行之理由予言不謬之實際萬一能承諸公分手抄錄散給四鄉尤爲拜禱感激之至

呈復民政司調查竣事文

爲呈覆事竊委員於三月二十二日奉前督憲徐檄飭前往鳳凰廳等屬履勘種烟地畝並調查禁烟情形據實呈覆等因遵於二十五日祇領川資後遂即料理起程至二十九日抵鳳凰城由鳳而寬而安而莊河而岫巖至是月十八日旋省所存以上各屬查勘日記並說詞均各分途郵呈在案惟是途越數千里日閱五六旬履勘情形稍有差異其禁種一層當以鳳凰兩屬爲優勝安東除日本租置地外間有一二業飭拔毀淨盡惟莊河一屬似較他屬稍遜三五日間共勘出烟地二十餘戶已另列表隨日記附呈岫巖州境先有少數經代理賀牧於三四兩月間迭經嚴勘拔毀迨委員抵境亦勘出少數尙不多見此查勘各屬烟地之實在情形也至烟館一層名雖停賣其實無處不有在鳳凰查獲三戶莊河一戶岫巖三戶均有烟具多數函送各該廳州核辦寬甸雖未查獲而官膏局

兼售之所安東與日本租界昆連更屬不堪聞問即如娼寮酒肆俱各暗藏此皆受日本租界烟館之影響所致查日本租界內烟館不下數百家六道溝烟地不下二三百畝日民種者固多而租給華民種者亦復不少擬請督憲特札交涉司或東邊道嚴行照會日領事一律毀閉淨盡以符萬國禁烟會議之約章此查禁各屬烟館之實在情形也其他吸烟人數較之曩昔雖已減少而各鎮之土膏店所在皆有毫無取締規則殊於禁烟前途大受影響委員不揣冒昧謹就管見所及附擬現在禁烟暨善後辦法六條並查獲烟地烟館表同川費開支清摺一併具文呈送憲台鑒核須至呈者

計開現在禁烟暨善後辦法六條

- 一 此次調查烟禁雖經派員分往各屬履勘風聲所樹民亦知畏惟爲時甚促足跡所至有限擬請再行通飭各府廳州縣嚴飭各該管巡警並鄉董挨次復勘取結存查以補委員之所不及方昭核實
- 一 此次查勘時始則烟苗甫出終則將近開花山陬偏僻之隅難免有所遺漏擬請通飭各府廳州縣俟交秋令即出示收買烟籽厚其價值咨託各該商會經手代買民心庶

無疑懼而根源亦易於斷絕

一 出示招買烟籽猶恐愚民貪圖烟土高價希望來春再種不肯盡行出賣情亦在所不免擬通飭各府廳州縣先期出示招告如有查獲私藏烟籽及來春再行偷種者無論軍民人等准其一體控告控告得實從重獎賞庶各聞風知懼不難盡絕根株

一 此次調查安東之日本租屬地烟苗烟館爲數甚夥其他南滿鐵路之附屬地諒亦不免擬請特札交涉司嚴行照會日本領事迅令一律毀閉方符萬國禁烟會議約章否則非租屬地亦不免受其影響

一 調查各屬烟館名雖停賣實則隨在皆有蓋原因有二(一)各城鎮均有售土店既有售土店即有吸烟所(二)各屬均無土膏專賣處既無專賣斯無限制即各地方官間有整辦者亦不過以強權治之偷犯者執以既有賣必有買既能買必能吸之詞來相詰問彼臨民上者又將何詞以對矛盾之政無所適從擬請迅即籌款或招商股訂定統一辦法通飭各屬設立土膏專賣處一致進行庶吸烟者有所取締而查禁吸食者亦易於施行如謂部章未定專賣處不便遽設亦宜及早籌維變通辦理或通飭各屬

籌款設立戒烟所凡境內吸烟者切實調查一律勒令入所戒斷不准任意偷吸否則官法未立而欲民先守法恐匪易易

一奉省烟禁曾經奏明本年一律禁絕茲擬數條雖未能曲中尺度或亦可稍補萬一無論此事如何為難敢請迅速設法籌訂畫一章程頒行各屬遵辦以符奏案而樹各省先聲尤為切要

計開查獲各屬烟地一覽表

| 縣名 | 種戶 | 住址 | 烟地畝數 | 查勘日期 |
|-----|-------|------|------|------|
| 安東縣 | 日本租屬界 | 六七道溝 | 約三百畝 | 四月十七 |
| | 趙叢民 | 五道溝 | 約七八分 | 十八 |
| 莊河廳 | 劉可仁 | 水車子 | 半畝許 | 十九 |
| | 呂長齡 | 同 | 半畝 | 同 |

| | | | | | | | | | |
|-------|-------|------|------|-----|-----|-----|-------|-----|------|
| 不知姓名人 | 不知姓名人 | 孫姓 | 倪佩金 | 畢殿升 | 趙福田 | 趙福才 | 不知姓名人 | 趙永坤 | 白風順 |
| 石家坡子 | 榆樹房 | 太平嶺 | 徒泡子沿 | 同 | 同 | 同 | 同 | 大營子 | 東瓜川 |
| 數塊 | 二塊 | 約二三分 | 半天 | 二三分 | 同 | 半畝 | 一畝 | 同 | 同 |
| 同 | 同 | 同 | 同 | 同 | 同 | 同 | 同 | 同 | 五月初六 |

| | | | | | | | | | |
|-----|-----|------|-----|-----|------|------|-------|----|------|
| 剛德明 | 李榮祥 | 李保城 | 李揆第 | 李占第 | 李其亮 | 王佐廷 | 不知姓名人 | 孫姓 | 陳永祥 |
| 大羊溝 | 半截溝 | 橫道河子 | 同 | 同 | 火石嶺子 | 石頭嶺下 | 東大營子 | 同 | 大房身 |
| 二分 | 二畝 | 約一二分 | 四畝 | 一畝 | 五畝 | 二十餘科 | 四壠 | 二分 | 十二條壠 |
| 同 | 同 | 同 | 同 | 同 | 同 | 同 | 初八 | 同 | 初七 |

| | | | | | | | | | |
|------|-----|------|-------|------|-----|-----|-------|--------------|------|
| 趙永富 | 趙永昌 | 趙白葵 | 不知姓各人 | 董家園子 | 官姓 | 緒春林 | 後林家園子 | 岫巖州 前家林園子 | 李保貞 |
| 溝外 | 下溝 | 岔子溝 | 城內 | 南門外 | 官家堡 | 同 | 同 | 北門城外 | 大石嶺 |
| 麥地夾出 | 三壠 | 菜地夾出 | 受旱已荒 | 同 | 同 | 同 | 同 | 菜地夾出 | 約二三分 |
| 同 | 十五 | 同 | 同 | 同 | 同 | 同 | 同 | 十四 | 同 |

| | |
|--|---|
| 明 | 說 |
| <p>張俊卿 二道千溝 約一天 同</p> <p>以上所勘各烟地均經立飭拔除淨盡此外鳳凰與寬甸兩屬因到境時烟苗甫經出土甚難辨認據耳所聞憑目所覩鳳屬不若寬屬之淨盡也寬甸去年辦法甚嚴受其影響者咸有戒心故耳</p> | |

計開查獲各屬烟館一覽表

| 縣名 | 烟戶 | 住址 | 烟具件數 | 查獲日期 |
|-----|------|-----|------|------|
| 鳳凰廳 | 周姓 | 邊門街 | 全副 | 四月初五 |
| | 鄂邑恆額 | 同 | 全副 | 同 |
| | 劉基 | 龍王廟 | 全副 | 二十三 |
| 莊河廳 | 趙士鎔 | 本街 | 全副 | 二十八 |

查勘禁煙日記

| | | | | |
|---|-----|-------|----|------|
| 岫巖州 | 陳烟館 | 南門外 | 二副 | 五月初九 |
| | 顧烟館 | 城外泡子沿 | 五副 | 同 |
| | 王烟館 | 城內 | 全副 | 同 |
| <p>明 說</p> <p>以上所獲烟具均已送各該地方官核辦此外未經查出者猶恐不一而足莊河岫巖兩屬尤無忌憚照章任意售賣安東與日本租界毘連更甚焉者惟寬甸一屬尙差強耳而官膏局又有兼售過客吸食一事殊屬缺憾已嚴重與姚令磋商迅即禁止未卜能實行否</p> | | | | |

宣統元年八月秋初版
中華民國元年十月秋再版
中華民國七年夏三版



編輯者
陳嘉言

印刷者

北京右安門內姚家井
京師第一監獄
電話南局九五七號

3107
B. 5